

△^{戊三}重說無常相三^{己一}標章^{己二}舉經^{己三}釋義。

今初

次重說有為功德無常相故。

△^{己二}舉經。

經曰。是故當知。世皆無常。會必有離。勿懷憂惱。世相如是。當勤精進。早求解脫。以智慧明。滅諸癡闇。世實危脆。無堅牢者。我今得滅。如除惡病。此是應捨。罪惡之物。假名為身。沒在老病。生死大海。何有智者。得除滅之。如殺怨賊。而不歡喜。

△^{己三}釋義四^{庚一}明無常相^{庚二}示無我觀^{庚三}證成可信^{庚四}唯智能滅。

今初

論曰。是中何故。重說有為功德無常相者。示現於此處。勸修世間。生厭離行故。於有為相中。得解脫故。如經。是故當知。世皆無常。乃至早求解脫故。

三重說中。初科有為功德。前章已明。不當重說。故先徵之。示現下出意。前但決疑。此勸厭離。故云於此處等。良以斷疑已竟。將事歸真。欲使精勤。令觀世相。世間是所厭。行即能厭。此釋是故當知下五句。於有為得脫。釋當勤下二句。

△^{庚二}示無我觀。

又示無我如實觀成就。能滅我所見根本故。如經。以智慧明。滅諸癡闇故。陰等諸法。皆不實故。如經。世實危脆。無堅牢者故。

二中如實觀。即我空智。由我我所能生諸見。故為根本。陰等諸法。即經世字。謂五陰世間。皆不實者。即法空智。

△^{庚三}證成可信。

又示如來。是度世大師。證成可信故。如經。我今得滅。如除惡病故。

三中言證成者。如來已度。是可信故。

△^{庚四}唯智能滅。

又說畢竟可厭患相。唯智能滅故。示現勸修智滅對故。得無對法現前故。如經。此是罪惡之物。如是等故。

四中畢竟可厭患。釋經初五句。罪惡物者。業惑所依也。假名已下。即苦報也。苦道深廣。故喻大海。唯智下。釋後四句。勸修智滅對者。釋上二句。智為能滅。即上二空智。對即所滅。即上三道。無對法現前者。釋後二句。殺怨賊者。喻上智對。未殺有對。已殺無對。此喻無學。惑

盡果圓。安住空寂故也。

△_{丙七}離種種自性清淨無我分三。_{丁一}標章。_{丁二}舉經。_{丁三}釋義。

今初

次說離種種自性清淨無我分。

第七標章二句。即下兩門。

△_{丁二}舉經。

經曰。汝等比丘。常當一心。勤求出道。一切世間動不動法。皆是敗壞不安之相。汝等且止。勿得復語。時將欲過。我欲滅度。是我最後之所教誨。

△_{丁三}釋義二。_{戊一}種種自性。_{戊二}清淨無我。初中三。_{己一}釋一心。_{己二}釋勤求。_{己三}釋敗壞。今初

論曰。是中種種自性者。於五陰法中。作種種見患故。妄想自性障故。此障對治。如經。汝等比丘。常當一心故。

種種自性中。初科五陰法者。即所計也。種種見患者。謂於五陰。廣生分別。即能執也。此見患體是妄想。能障自心。故云自性障。由差別妄見。故以一心治之。

△_{己二}釋勤求。

復以一心如實慧難可得故。如經。勤求出道故。

次科如實慧。即上一心。了達空智。是出離道。以其難得。故勸勤求。

△_三釋敗壞。

又示除如實慧。所有相對法。悉無常故。示現名相等法。應知。如經。一切世間動不動法。皆是敗壞不安之相故。於中動不動者。謂三界相。靜亂差別故。

三中除實慧者。唯此空智。非無常故。相對法。即世間有為。皆有待對。因緣生滅。故悉無常。名相等者。即上五陰。一一法中。名相差別。動即欲界散業。不動即上二界定業。故云靜亂差別。有將依正色心分者。不看論故。然此三界。靜亂等法。還即五陰。前多妄想。由不了無常。此示一心。故特彰敗壞。

△_成清淨無我二_二釋且止_三釋教誨。

今初

清淨無我者。示現於甚深寂滅法中。寂滅故。如經。汝等且止。如是等故。且止勿語者。勸示三業無動故。是寂滅無我。相應器故。

次清淨無我中。初文清淨無我。即指空理。所謂甚深寂滅法也。清淨。對下止三業也。無我。

對下我欲滅也。於中寂滅。所謂入涅槃也。且止是身。勿語是口。義兼於意。三業無動。堪證寂滅。故云相應器也。問。如來入滅。那勸弟子。止三業耶。答。佛無生滅。方便示現。意使羣徒。相承修證。故也。時欲過者。即當中夜。表二種中道。如序中說。

△釋教誨。

最後教誨者。正顯遺教義故。是遺教義。於住持法中勝。以其遺教故。

二中遺教名義。題中已引。住持勝者。正為未來故。以其遺教者。顯勝所以。竊詳經末。似闕結文。已見序中。故此不序。宜引是時中夜。寂然無聲。二句接之。則始終理順。恐忘前文。故重示。按南山感通傳。迦葉結集。阿難昇座。先誦此經。是時大菩薩等。聞皆悲泣。不能自勝。又律中。若說戒日。無能誦戒者。當如布薩法。誦遺教經。又準壇經。登壇受戒。首誦此經。受已出壇。復須再誦。故知此典。正被今時。凡預五門。宜專誦習。尋言得解。如說而修。豈唯策進心神。仰使住持佛化。諦觀慈訓。塵劫難逢。深念聖恩。碎身奚報。敢効書樹。題石。剝血。剝皮。竭力傳通。盡誠弘贊。螢燭聊增於日月。塵露少益於海山。誓與羣倫。共嚴淨報。

遺教經論住法記終

古云。化制互陳。戒定齊舉。莫大乎遺教經焉。推徵解釋。開誘行業。莫深於馬鳴論矣。疏理義趣。決擇章句。莫明于大智記也。誰不遵奉。然所行世。科與記不接。經論言亘兩端。起盡易惑。余染指之次。繫科於文前。入記於論間。終成一帙。聊助檢閱之費功。兼校讎古本。訂正烏焉。遂命劄劂氏。傳諸不朽云爾。

時天和。癸亥二月望。雒北沙門。伯英祖泰謹誌。